

**KANTONALNA
PRIVREDNA
KOMORA TUZLA**

**BROJ 9 i 10/15,
septembar/oktobar
2015. godine**



KOMORSKI INFORMATOR



**NOVI BEKO SHOP
SARAJEVO I GORAŽDE**



**130 GODINA "SOLANE" dd
TUZLA**



**BOSNA I HERCEGOVINA U
ZAJEČARU**



**NASTUP NA SAJMU
"EKOBIS 2015" U BIHAĆU**

Komorski informator

Uvod

Poštovani čitaoci!



Raduje činjenica da je ponovo iza nas period značajnih aktivnosti u Komori i izvan nje. Puno događanja koja zavrjeđuju da budu istaknuto u uvodu u Komorski informator za septembar i oktobar, koji preporučujemo da svakako pročitate pažljivo.

Donosi ovaj broj informacije o niz susreta i sastanaka u Komori. Posjetili su nas privrednici iz Austrije, delegacija iz Ambasade Mađarske u BiH, ministarstva za razvoj i poduzetništvo Tuzlanskog kantona. Kad već pominjemo kantonalno ministarstvo, pomenimo da se ponovo uspostavlja kvalitetniji odnos Vlade TK i Komore pa je odmah i više stranica posvećeno aktivnostima Vlade i premijera.

Dita je i dalje u centru privrednih zbivanja, ovoga puta kao domaćin sastanka Odbora za hemiju i nemetale Kantonalne privredne komore Tuzla. Aktivno je bilo i u Odboru komorskog Udruženja za trgovinu, ugostiteljstvo i turizam iz kojeg se poručuje kako vlada veliko interesovanje privrednika za saradnju sa Turskom. Prenosimo i dvije priče iz RMU Banovići, informaciju o obilježavanju 130 godina Solane dd Tuzla, otvaranju novih Beko shopova u Sarajevu i Goraždu, zvaničnom početku kampanje „Prepoznaj domaće – Budi ponosan – Made in BiH”, nekoliko agencijskih vijesti iz firmi članica Komore.

S pravom i sa velikim zadovoljstvom, najviše prostora posvećujemo sajamskim aktivnostima. Ponovo je Komora zahvaljujući snažnoj međukomorskoj saradnji u zemlji i inostranstvu, bila prisutna i predstavila “Privredu TK” na značajnim sajamskim manifestacijama. I za nas u Komori a i za naše privrednike, veoma su bitni sajmovi u Bihaću i Zaječaru gdje smo izvanredno dočekan i gdje nam je dodjeljen prostor za predstavljanje naših članica. Isto nas u novembru očekuje i u Brčko Distriktu, treći sajam u nizu koji organizuju privredne komore. Naime, jedina u FBiH je Privredna komora USK koja ima svoj sajam, u BiH je uz Bihać organizator sajma i Privredna komora Brčko Distrikta a Regionalna privredna komora Zaječar je jedina komora u Srbiji koja je organizator sajma. Uz to, prva je komora u Srbiji koja je organizovala Regionalnu konferenciju predsjednika privrednih komora a kao nastavak aktivnosti početih u Celju i Splitu, kada je u pitanju okupljanje predstavnika komorskog sistema regije. Prisustvovali smo i ovoj konferenciji, na naše veliko zadovoljstvo...

Dino Kalesić
gl. i odg. urednik

BESPLATNI SEMINARI ZA MENADŽERE I UPOSLENIKE PRIVREDNIH SUBJEKATA

Kantonalna privredna komora Tuzla, u saradnji sa Ekonomskim fakultetom Tuzla, realizira projekat “Provedba edukativnih programa u funkciji implementacije koncepta cjeloživotnog učenja”, u okviru kojeg će se održati besplatni seminari za menadžere i zaposlenike privrednih subjekata iz Tuzlanskog kantona. Temе seminara:

- **DIGITALNI MARKETING** - Dizajniranje i obrada hipermedijalnih sadržaja, Digitalni kanali komunikacije, Tržište digitalnog marketinga, Digitalna kampanja, Praktični rad
- **VJEŠTINA KOMUNICIRANJA U PRODAJI** - Ovladavanje fazama prodajnog procesa, Primjene emocionalne inteligencije u vođenju prodajnih razgovora, Razvijanje verbalnih i neverbalnih komunikacijskih vještina, Uloga materijalnih i nematerijalnih kompenzacija u motivisanju prodajnog osoblja.
- **OSNOVI FINANSIJSKE ANALIZE U EXCELU** - Problematika vremenske vrijednosti novca, Mjerenje rizika i prinosa pojedinačnih vrijednosnih papira, Analiza portfolija od dva vrijednosna papira,
- **STATISTIČKA ANALIZA I OBRADA PODATAKA - MS EXCEL** kao alat za statsitičku obradu podataka, Standardne funkcije, Analysis toolpak, Priprema i unos podataka, Crtanje grafikona, Deskriptivna statistika, Formiranje uzoraka, Regresiona i korelaciona analiza.

Seminari u trajanju od 12 sati (tri dana) će se održavati u Kantonalnoj privrednoj komori Tuzla i na Ekonomskom fakultetu u Tuzli. Termin održavanja će naknadno biti utvrđeni sa svakom grupom pojedinačno, u skladu s mogućnostima polaznika seminara. Svi zainteresovani kandidati se mogu prijaviti, popunjavanjem prijavnog obrasca (na web stranici Komore: www.kpktz.ba) i slanjem na e-mail: edina@kpktz.ba ili fax: 035/369-552. Kontakt osoba Edina Kurtić. Moguće je učešće više polaznika iz istog preduzeća. Broj mjesta je ograničen.



Komorski informator

Sadržaj

KANTONALNA PRIVREDNA KOMORA TUZLA

KOMORSKI INFORMATOR
BROJ 9 i 10/15,
septembar/oktobar
2015. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Bajazit Jašarević, član
4. Suad Selimović, član
5. Nurudin Žunić

REDAKCIJSKI KOLEGIJ:

1. Nedret Kikanović, član
2. Esad Arnautović, član
3. Nurudin Žunić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Adnan Imerović, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	Predstavници austrijskih kompanija u Komori Tuzla	4
	Ekonomska savjetnica Ambasade Mađarske posjetila Komoru Tuzla	5
	Zajedničke aktivnosti na unaprijeđenju poslovnog ambijenta na području TK	6
	Dita domaćin sastanka Udruženja za hemiju	7
	Privrednici žele dugoročniju saradnju sa Turskom	8
	Iz RMU Banovići	9 i 10
	130 godina "Solane" dd Tuzla	11
	Bosna i Hercegovina u Zaječaru	12 i 13
	Potpisan sporazum o saradnji Komora Zaječar i Tuzla	14
	Nastup na sajmu "Ekobis 2015" u Bihaću	15
	Poziv privrednicima za sajam u Brčkom	16
	Novi Beko Shop Sarajevo i Goražde	17
	Iz Vlade Tuzlanskog kantona	19 i 20
	Vijesti iz privrede	21 i 22



Austrijanci posjetili Komoru...

Predstavници austrijskih kompanija u Komori Tuzla

Sastanak na inicijativu Trgovinskog odjela Ambasade Austrije u BiH

U Kantonalnoj privrednoj komori Tuzla je na inicijativu Trgovinskog odjela Ambasade Austrije u BiH, upriličen sastanak sa predstavnicima austrijskih kompanija "Austrian Institute of Technology GmbH" i "ILF Consulting Engineers Austria GmbH". Delegaciju je u ime Sigmunda Nemetija trgovinskog savjetnika austrijske Ambasade predvodila Razija Hamidović projekt menadžer. Kako je istakla, riječ je o privrednim subjektima koji imaju bogato iskustvo u oblasti inovacija, istraživanja, energije, transporta, fokusirani na infrastrukturne projekte. Već imaju brojna saznanja o aktivnostima u širem regionu a želja je bila da se predstave i tržištu Tuzlanskog kantona. Nedret Kikanović predsjednik Kantonalne privredne komore Tuzla se zahvalio na posjeti izrazivši zadovoljstvo interesovanjem gostiju iz Austrije za oblast Energetske efikasnosti. **"Veoma je to interesantna oblast za Tuzlu i Tuzlanski kanton. Impozantne su reference austrijskih privrednika i temelj su njihovih ozbiljnih namjera da ostave traga i na ovom području. Komora je uvijek na raspolaganju, tu smo da pružimo maksimalnu podršku, da budemo servis i poveznica u kontaktima sa privrednicima, lokalnim zajednicama i Vladom Tuzlanskog kantona"**, izjavio je predsjednik Kikanović.



Munir Merdan i Reinhard Schütz iz "Austrian Institute of Technology GmbH" su istakli zadovoljstvom sastankom i otvorenosti Komore za buduću saradnju. **"Naš cilj je bio da se upoznamo sa tekućim i planiranim aktivnostima iz oblasti koje smo označili kao interesantne. Želimo sagledati mogućnosti zajedničke saradnje u oblasti energetske efikasnosti sa ciljem unaprjeđenja već dobrih privrednih odnosa naše dvije države"**, izjavio je gospodin Merdan. Esad Arnautović dopredsjednik Komore je predstavio dosadašnje komorske aktivnosti kada je riječ o oblasti energetske efikasnosti. Istakao je kako je u posljednjih nekoliko godina ostvareno niz kontakata vezanih

za formiranje Centra za standarde i ekologiju, da su ostvareni kontakti sa relevantnim centrima, agencijama i udruženjima u Bosni i Hercegovini. **"Kao plod tih kontakata i aktivnosti, realizovali smo brojne seminare, obuke, predavanja za naše privrednike a u saradnji sa značajnim institucijama i priznatim univerzitetima u Bosni i Hercegovini"**, rekao je dopredsjednik Arnautović. Nurudin Žunić sekretar komorskog Udruženja za energetiku, rudarstvo i industriju pozdravio je inicijativu austrijske delegacije i pozvao ih na kontinuiranu saradnju, razmjenu iskustava i saznanja. **"Ogromne su mogućnosti saradnje u pomenutim oblastima. Ne treba isticati koliko je moguće aktivnosti sprovesti u jednom karakterističnom rudarskom kraju kakav je Tuzlanski kanton pa sve do "pametnih" rješenja u gradskim oblastima"**, naglasio je sekretar Žunić.



Georg Siegel iz "ILF Consulting Engineers Austria GmbH" je predstavio kompaniju iz koje dolazi istakavši da je već ranije stekao određena saznanja o problemima koji prate realizaciju projekata na području Tuzlanskog kantona. **"Mi imamo saznanja da su finansije veliki problem. Spremni smo, kao većinska državna firma, učiniti maksimalne napore da se ti problemi prevaziđu. Imamo reference iz cijelog svijeta, najnovije iz Beča i Kine koje nas stavljaju u poziciju ozbiljnog pregovarača i kada je u pitanju animiranje partnerskih firmi i kada su s druge strane Evropska banka za razvoj, Svjetska banka ili druge institucije i fondovi koji mogu biti rješenje finansijskih problema. Spremni smo s njima ući u pregovore o povlačenju sredstava za realizaciju kvalitetnih projekata od javnog interesa, istovremeno, projekata koji donose višestruku korist"**, izjavio je Georg Siegel. Na kraju, kao prvi naredni korak buduće saradnje, predsjednik Kikanović je predložio da se u najskorije vrijeme organizuje u Komori prezentacija svega onoga što austrijski privrednici mogu da urade. Biće to prilika da predstavnicima privrednih subjekata, Vlade i lokalnih zajednica Tuzlanskog kantona prenesu iskustva, predstave firme, dosadašnje aktivnosti, zajedno preciziraju najpovoljnije i najkvalitetnije projekte na čijoj bi realizaciji radili u narednim fazama saradnje.

D.K.



Diplomatske posjete u Komori...

Ekonomska savjetnica Ambasade Mađarske posjetila Komoru Tuzla



U nizu aktivnosti iz Kantonalne privredne komore Tuzla je i posjeta Dominike Horvat ekonomske savjetnice Ambasade Mađarske u BiH. U pratnji Asima Ibrahimagića pomoćnika direktora Agencije za rad i zapošljavanje BiH, upriličila je posjetu Tuzli i Tuzlanskom kantonu. Razgovarala je sa predsjednikom i dopredsjednikom tuzlanske komore Nedretom Kikanovićem i Esadom Arnautovićem, predstavila svoja iskustva i aktivnosti, obaveze na novoj funkciji. Istakla je savjetnica Horvat veliko iskustvo stečeno na brojnim projektima u širem regionu. I jedna i druga strana su na sastanku istakle zadovoljstvo ovim susretom i aktivnostima koje će oživjeti kontakte privrednika Mađarske i Tuzlanskog kantona i saradnju Ekonomskog odjela Ambasade Mađarske i Kantonalne privredne komore Tuzla. Razgovaralo se o privrednim kretanjima na području kantona, gostima je predstavljena komorska publikacija "Tuzlanski kanton vaš poslovni partner" i prezentovan projekat Investicionih mogućnosti na području Tuzlanskog kantona. Zajednički je stav kako je neophodno ojačati privrednu saradnju, pomoći u jačanju privrednih veza, ostvarivanju novih kontakata, jačati uvozne i izvozne parametre. Za sve navedeno postoje realne mogućnosti, postoji zainteresovanost sa obje strane. Neophodno je uložiti napore za oživljavanje privrede TK kojoj su potrebni novi, jaki i kvalitetni investitori pa s tim u vezi radije inicijativa iz mađarske Ambasade za nastavkom saradnje sa tuzlanskom komorom. Temeljem svega rečenog na sastanku u Komori, za očekivati je u najskorije vrijeme i organizovanje B2B susreta, razgovora o zajedničkim projektima, zajedničkim apliciranjima za sredstva iz EU fondova. Paralelno sa ovim inicijativama i aktivnostima, potrebno je jačati aktivnosti kroz Euroregionalnu suradnju Dunav-Drava-Sava koja obuhvaća dijelove Bosne i Hercegovine, Hrvatske i Mađarske ako je ustanovljena je još 1998. godine.

Iz Kantonalne privredne komore
Tuzla...

Povećan broj članica Komore

- Ukupno 9 privrednih subjekata novi članovi Komore -

Kada je u pitanju članstvo u Kantonalnoj privrednoj komori Tuzla, zadovoljstvo je istaći kako se nastavlja trend povećanja broja članica, iz mjeseca u mjesec. U posljednjih dva mjeseca velikom broju privrednih subjekata koje su potpisale članstvo u Komoru, pridružilo se još šest. Riječ je o slijedećim firmama koje su se odmah po učenju u Komoru, aktivno uključile u rad granskih udruženja te u sudjelovanje na sajamskim manifestacijama u okviru zajedničke sajamske postavke pod nazivom "Privreda TK". To su "Granatex" doo Tuzla, "Džerikom" doo Gradačac, "Vokal productions" doo Doboj Istok, "Olimptex" doo Gračanica, "ME-in" doo Tojšići/Kalesija, "Hazex" doo Gradačac, "Ljaljić turs" doo Čelić, "Kalabria-turs" doo Gračanica, "Čokoladni svijet" Tuzla.

D.K.



Saradnja Vlade TK i Komore Tuzla...

Zajedničke aktivnosti na unapređenju poslovnog ambijenta na području TK

Sastanak predsjednika Kikanovića i ministra Hodžića – Razgovarano o mogućnostima zajedničkih aktivnosti na realizaciji projekata vezanih za stvaranje povoljnijih privrednih prilika na području Tuzlanskog kantona



Nedret Kikanović predsjednik Kantonalne privredne komore Tuzla i njegovi saradnicima, upriličili su sastanak sa Nerminom Hodžićem ministrom za razvoj i poduzetništvo u Vladi Tuzlanskog kantona. Razgovaralo se o mogućnostima zajedničkih aktivnosti na realizaciji projekata vezanih za stvaranje povoljnijih privrednih prilika na području Tuzlanskog kantona. Između ostalog, analizirano je aktuelno stanje privrede Tuzlanskog kantona, predstavljene aktivnosti u Komori na realizaciji projekata izrade publikacije "Tuzlanski kanton vaš poslovni partner" i nove baze podataka privrednih subjekata sa područja Tuzlanskog kantona. Glavna tema sastanka bio je dokument koji priprema Komora pod nazivom "Mjere za unapređenje poslovnog ambijenta u Tuzlanskom kantonu". Ministru Hodžiću je predložen zajednički angažman na realizaciji ciljeva zacrtanih ovim dokumentom. **"Za Tuzlanski kanton prioritet mora biti zaustavljanje trenda povećanja broja nezaposlenih i očuvanje postojećih i otvaranje novih radnih mjesta, posebno u realnom sektoru. Visoka nezaposlenost direktno i indirektno onemogućava punjenje budžeta i fondova, stvara socijalnu nestabilnost i produbljuje siromaštvo. Stvaranje adekvatnog poslovnog okruženja i rasterećenje privrede je jedini način da se sačuvaju postojeći privredni subjekti i privuku nove investicije. Pri tome poseban značaj treba dati izvozno orijentisanim, proizvodnim preduzećima"**, istakao je na sastanku Nedret Kikanović predsjednik Kantonalne privredne komore Tuzla.

Nakon analize tačaka predviđenih za realizaciju u ponuđenom dokumentu

zaključeno je na prijedlog ministra Hodžića da se formira zajednički tim koji će uraditi naredni korak. "Mi moramo što prije pristupiti realizaciji zacrtanih ciljeva kako bi što prije stvorili uslove da privrednici kvalitetnije posluje, da razvijaju privredu, otvaraju nova radna mjesta, prave svima nama povoljniji životni ambijent. Da bi taj posao uradili na najbolji mogući način, moramo poduzeti određene korake koji će nam to olakšati a to je odabir najvažnijih segmenata, konkretizacija određenih tačaka i predloženih ciljeva, hitno pristupanje aktivnostima koje u najkraćem roku mogu polučiti konkretne rezultate", rekao je Nermin Hodžić ministar za razvoj i poduzetništvo u Vladi TK. Ciljevi čija realizacija bi u velikom olakšala razvoj privrede na ovim prostorima, u najvećoj mjeri se odnose na pokretanje inicijativa za izmjene i dopune određenih zakona na federalnom nivou. Prvenstveno je potrebno provesti aktivnosti na smanjenju doprinosa za radnike te omogućiti plaćanje PDV-a po naplati potraživanja kao i ukidanje prava na odbitni PDV za fakture koje nisu plaćene. Dokument još obuhvata i aktivnosti na uspostavljanju efikasnijeg sistema podsticaja, stvaranje kvalitetnijeg ambijenta za pokretanje novog biznisa, subvencioniranje novoupisanih radnika. Predlaže se iznalaženje mogućnosti u Budžetu TK za podsticanje izvoza i zapošljavanje, za osiguranje povoljnih kreditnih sredstava privrednicima i obrtnicima, za smanjenje sive ekonomije uz transparentniji rad inspeksijskih službi i još nekoliko tačaka čijom realizacijom bi se u velikoj mjeri poboljšao poslovni ambijent na području Tuzlanskog kantona.

D.K.



Iz Udruženja za hemiju i nemetale...

“Dita” domaćin sastanak Odbora Udruženja za hemiju

Pozitivna atmosfera oko Dite - Potrošači su na primjeru “Dite” pokazali nivo razvijenosti svijesti o kupovini domaćeg - Prije zacrtanog roka rješenje problema parovoda i početak proizvodnje praškastih proizvoda



Fabrika deterdženata “Dita” Tuzla, i dalje je u centru privrednih aktuelnosti. Ovoga puta bila je u ulozi domaćina sastanka Odbora Udruženja za hemiju i nemetale Kantonalne privredne komore Tuzla. Razgovaralo se o aktuelnoj problematiki, te o tehničko-tehnološkim uslovima za nastavak održive proizvodnje u Fabrici deterdženata “Dita” Tuzla. Naravno da je i tema i mjesto održavanja sastanka privuklo veliki broj učesnika u raspravi, baš kao i priličan broj predstavnika sredstava informisanja. Izlaganja su se smjenjivala i nastavljala jedno na drugo, baš kao i novinarska pitanja. **“Objektivno gledano, mi smo zadovoljni. Napravili smo te prve korake, veoma značajne korake, stvorena je oko nas pozitivna atmosfera. Uspjeli smo isplatiti tri plate sa svim doprinosima, prijevoz radnicima, određen iznos na ime PDV-a. Svima je u interesu, a tako i treba da bude, da se i ova i sve fabrike koje nisu tehnološki narušene, osposobe, da rade, da zapošljavaju radnike. U konačnici, to moramo reći, sudbine i naša i svih ostalih domaćih firmi su u rukama krajnjih potrošača, naših građana. Ukoliko se više bude kupovalo domaće proizvode, doprinjet će se rastu proizvodnje što je veoma značajno za fabrike u oporavku. Potrošači su na primjeru “Dite” pokazali nivo razvijenosti svijesti o kupovini domaćeg na čemu smo zahvalni i poručujemo da se tako nastavi sa svim ostalim proizvodima i da se da maksimalan doprinos jačanju domaćih privrednih subjekata”,** prvi je pred novinare stao Hajrudin Kunalić stečajni upravnik “Dite”.

U okviru Udruženja za hemiju i nemetale Kantonalne privredne komore Tuzla, razmatrana je aktuelna problematika u brojnim privrednim subjektima sa područja Tuzlanskog kantona. Na red je, na veliko zadovoljstvo, došla i “Dita” u jednom znatno pozitivnijem ambijentu nego je to bio slučaj ranijih godina. **“Analizirajući tehničko-tehnološke uslove za nastavak održive proizvodnje u Fabrici deterdženata “Dita” Tuzla, vidimo određene poteškoće**

kod nabavke sirovina i repromaterijala iz inostranstva i mogućnost zamjene domaćim. Važno je da se ovim temama bave stručnjaci, najbolji poznavaoци hemijskih procesa na ovom području i za očekivati je da i Dita i drugi privredni subjekti koji se odluče na ovakav vid saradnje sa ovim komorskim Udruženjem, mogu očekivati značajne prijedloge i rješenja. Ujedno, to može biti od koristi i Vladi TK koja podržava projekat oporavka “Dite” i drugih privrednih subjekata, treba iskoristiti svo znanje i pamet, sve raspoložive institucije, udruženja, ustanove, nivoe vlasti da se bar približno ovaj i ovakvi privredni subjekti vrate na nivo kakav je nekada bio”, izuzetno je optimističan prof. Mustafa Burgić.



Novinare je interesovalo da iz prve ruke čuju ono o čemu se u medijima već pisalo i govorilo. Tema su bili problemi sa parovodom i situacija za proizvodnjom praškastih proizvoda. **“Potpisan je ugovor sa “Remont montažom” izvođačem radova, a uz pomoć JP Elektroprivrede BiH. Radnici su u ponom pogonu, urađeno je mnogo toga što je potrebno za normalizaciju parovoda. Vrlo smo blizu rješenja problema čak i prije zacrtanog roka što bi znači vrlo brzo stvaranje uslova za početak proizvodnje praškastih proizvoda. Mi znamo i dokazali smo da “Dita” može raditi i na to smo ponosni. Čiji plan bio da se to raznim mešetarenjima kroz privatizacijske procese onemoguću, da se “Dita” dovede u ovakvo stanje, ne znamo ali smo učinili maksimalne napore da ga osujetimo. Nadamo se da ćemo, uz pomoć svih institucija pa i Kantonalne privredne komore Tuzla, postaviti “Ditu” ponovo na snažne noge i napraviti od fabrike ponovo jedno od vodećih preduzeća u široj regiji”,** izjavio je Dževad Mehmedović predsjednik sindikata Fabrike deterdženata “Dita” Tuzla.

D.K.



Iz Udruženja za trgovinu, ugostiteljstvo i turizam...

Privrednici žele dugoročniju saradnju sa Turskom

U Komori firme koje uspješno posluju – „Piemonte“ Tuzla uspješno realizovala izvoz u Tursku - Nedostatak stočnog fonda za izvoz mesa - Privrednici TK žele da se aktivno uključe u proizvodnju hrane

Privrednici sa područja Tuzlanskog kantona, uglavnom iz firmi članica Komore, žele da uspostave dugoročnu poslovnu saradnju sa Republikom Turskom. Tuzlanski kanton raspolaže značajnim kapacitetima poljoprivrednog zemljišta na kojem može da se pokrene proizvodnja zdrave hrane (izgradnje smještajnih kapaciteta sa adekvatnom putnom komunikacijom). Kantonalna privredna komora okuplja privredna društva koja vrlo uspješno posluju i pored činjenice o nedostatku poslovnog ambijenta, uredno servisiraju svoje obaveze prema državi, uposlenicima, dobavljačima i dr. učesnicima vezanim za obavljanje privrednih aktivnosti.



Ovom prilikom želim s razlogom da istaknem članicu Komore firmu „PIEMONTE“ d.o.o. Tuzla koja je vrlo uspješno realizovala prvi tender koji se odnosi na izvoz mesa za Republiku Tursku. Firma „PIEMONTE“ d.o.o. je u potpunosti ispoštovala svrhu i ciljeve sporazuma potpisanog između BiH i Republike Turske. Vršila je otkup žive stoke koja je uzgajana u BiH, pokrenuti su proizvodni kapaciteti koji su duži niz godina bili van funkcije, te je zaposlen značajan broj radnika, koji su duži vremenski period bili nezaposleni. U raspoloživim proizvodnim kapacitetima je obavljena vrlo kvalitetna proizvodnja s čime su kupci bili zadovoljni. Takva jedna poslovna aktivnost koja je obavljena vrlo kvalitetno je omogućila nastavak daljeg izvoza mesa za Republiku Tursku. Nažalost moram da napomenem da neki od izvoznika ne izvršavaju svoje obaveze u skladu sa preuzetim obavezama iz navedenog sporazuma što smo imali priliku da čitamo ovih dana u dnevnoj štampi. Dosadašnja saradnja sa Republikom Turskom je dala izuzetno dobre rezultate, posebno kad je riječ o najosjetljivijoj grani poljoprivrede – sektor stočarstva je prije potpisivanja sporazuma sa Republikom Turskom bio u veoma teškom stanju zbog ogromnih tržišnih viškova i veoma niske cijene proizvoda.

U veoma kratkom vremenskom periodu situacija u navedenom sektoru se potpuno promijenila, danas imamo stanje nedostatka stočnog fonda za izvoz mesa, tako da su se naši farmeri okrenuli uvozu žive stoke kako bih nadomjestili nedostatak značajnih količina mesa namjenjenih izvozu u Republiku Tursku. Danas imamo stanje pokretanja masovne proizvodnje hrane, podizanja smještajnih kapaciteta za tov junadi sa znatno većom cijenom proizvoda u odnosu na period prije izvoza mesa u Republiku Tursku, zapošljavanje značajnog broja ne zaposlenih osoba, što ima za rezultat smanjenje siromaštva kao i smanjen broj odlaska mladih iz BiH u cilju zapošljavanja.



Privrednici TK žele da se aktivno uključe u proizvodnju hrane s ciljem stavljanja u funkciju ogromnog poljoprivrednog potencijala. A od nadležnih institucija očekuju uspostavu dugoročne saradnje sa Republikom Turskom kao i EU u cilju plasmana naših proizvoda koji u svakom slučaju mogu da konkurišu kvalitetom i cijenom proizvoda na tržištu TR i EU. Ovakvim pristupom rješavanja stanja u privredi od strane nadležnih institucija naši privrednici nude rješenje zapošljavanja ogromnog broja nezaposlenih ali veoma stručnih mladih kadrova kao i bolje punjenje budžeta na svim nivoima vlasti što će dati željene efekte samnjenja zaduživanja BiH kod Međunarodnog monetarnog fonda (MMF-a), svjetske banke kao i kod komercijalnih banaka u BiH.

Kasim Selimović, predsjednik Odbora
Udruženja za trgovinu, ugostiteljstvo i turizam
Kantonalne privredne komore Tuzla



Iz RMU Banovići...

Projekat u cilju zaštite jezera Modrac

Jedan od važnijih projekata zaštite voda - Vrijednost projekta je oko milion KM - jedan od 111 projekata ukupne vrijednosti od preko 5.5 miliona KM



Rudnik mrkog uglja Banovići uz pomoć sredstava Fonda za zaštitu okoliša FBiH realizirat će jedan od važnijih projekata zaštite voda od značaja za FBiH, a odnosi se na čišćenje, odvoz i odlaganje taloga iz zemljanih taložnih bazena iz organizacione jedinice separacije ovog rudnika, piše bh novinska agencija Patria. Vrijednost projekta je oko milion KM, a sa Fondom za zaštitu okoliša potpisan je ugovor o dodjeli sredstava u iznosu od 200.000 KM.

Ovo je jedan od 111 projekata ukupne vrijednosti od preko 5.5 miliona KM, kojima su po Javnom konkursu za dodjelu sredstava za realizaciju programa, projekata i sličnih aktivnosti iz područja zaštite okoliša za 2015. godinu odobrena sredstva Fonda za realizaciju. Projekat je od šireg društvenog značaja, a njegovom implementacijom se očekuje da će u značajnoj mjeri smanjiti utjecaj otpadnih voda na površinske vode u slivu Akumulacije Modrac, te tako zaštititi kvalitet vodotoka u ovom slivu. Potpisnici ugovora, direktor Fonda za zaštitu okoliša Federacije BiH Safet Harbinja i direktor Rudnika mrkog uglja „Banovići“ Munever Čerčić istakli su važnost ovog projekta koji se implementira u nekoliko faza. **„U prethodnih nekoliko mjeseci smo izvršili sve pripremne aktivnosti za nesmetanu realizaciju ovog projekta, i već smo započeli sa čišćenjem. Realizacijom ovog projekta obezbijedit će se čišćenje taložnih bazena i ispunjenje uslova za funkcionisanje sistema prečišćavanja voda, te postići potreban kvalitet vode u izlazu prema rijeci Oskovi, u skladu sa svim zakonskim obavezama. Projekat je koncipiran i tehnološki provodiv u nekoliko faza, odnosno nekoliko godina, gdje bi se stvorili preduslovi za dalji normalan rad separacije u cilju zaštite jezera Modrac kao resursa pitke vode. Također imamo u planu izvršiti ispitivanje zemljišta u saradnji sa nadležnim institucijama kako bi se moglo pristupiti završnoj fazi uređenja odlagališta Ježevac i taložnih bazena”,** kazao je Čerčić te se zahvalio Fondu i istakao nadu za daljnjom saradnjom.

Direktor Fonda Safet Harbinja kazao je da je ovaj projekat samo dio aktivnosti koje se, u saradnji sa drugim institucijama, domaćim i međunarodnim, planiraju realizirati kada je zaštita jezera Modrac, kao zaštićenog vodnog resursa od vitalnog značaja za Tuzlanski kanton, u pitanju. **„Naš krajnji cilj, kada je problem zagađenja hidroakumulacije Modrac u pitanju, jeste obezbijediti sveobuhvatno, konačno i kvalitetno vodosnabdijevanje općina, kao i vode za industrijska postrojenja”** kazao je Harbinja. S obzirom da otpadne vode iz proizvodnih pogona rudnika imaju veliki utjecaj na kvalitet i stanje voda jezera Modrac, kao i na opće ekološko stanje vodotoka u koje se otpadne vode ispuštaju, te da se radi o ključnom ekološkom problemu na području Tuzlanskog kantona, projekat „Čišćenje, odvoz i odlaganje taloga iz zemljanih taložnih bazena iz organizacione jedinice separacije RMU „Banovići“ je jedan od prioriteta Vlade FBiH kada je zaštita okoliša u pitanju.

D.K.





Direktor Munever Čeragić za Nezavisne novine:

“Rudari zadovoljni i poslom i platom”

Blizu 3.000 rudara koji rade u Rudniku mrkog uglja Banovići zadovoljno je poslom - Plate redovne, jedan rudar u prosjeku dobije mjesečno oko 1.500 KM



Jedini rudnik u FBiH koji je izvan koncerna “Elektroprivrede BiH” posluje bolje nego većina ostalih rudnika. Zapošljavajući oko 3.000 radnika te ostvarujući godišnje prihode od više od 150 miliona KM, Rudnik mrkog uglja Banovići je žila kucavica razvoja ove općine. Međutim, da bi Rudnik bio u poziciji u kakvoj je sada, bilo je potrebno mnogo muke i truda, kažu nam rudari, te dodaju da je najodgovorniji i najzaslužniji za to njihov direktor Munever Čeragić, koji je na ovoj poziciji od 2004. godine. Pričaju kako je bilo teško prije 12 godina, te kako su zahvaljujući novoj upravi uspjeli podići Rudnik na noge i obezbijediti da danas veliki broj žitelja Banovića ima zaposlenje. Dok se vozimo “ćirom” kojim rudari svakodnevno dopremaju ugalj od kopa do Banovića prugom dugačkom oko šest kilometara, rudar Demir kaže za Nezavisne novine da su zadovoljni poslom.

“Radim na prijevozu. Imamo ljude koji rade na utovaru i tako svakodnevno prevozimo ugalj. Ima nas dosta, oko 3.000, lijepo je, plate redovne, općina se razvija, još kad se izgradi termoelektrana bićemo sami svoji gospodari. Imaćemo finalan proizvod, neće nam biti potrebna ‘Elektroprivreda’”, priča Demir, ponosan na ono što su ostvarili rudari i Uprava. Samir, mladić koji je ove godine počeo raditi u ovom rudniku, kaže da je plata dobra i redovna i da nije tako teško raditi u rudniku kad imate uslove i dobre kolege koji vam pomažu. Munever Čeragić, generalni direktor Rudnika, rekao je da su nabavili četiri nova dampera, što će im uveliko olakšati rad i prevoz uglja. Ističe da su u zadnjih 11 godina, kako je na čelu Uprave, nadljudskim naporima i mudrim potezima doveli do toga da Rudnik Banovići danas vrijedi kao jedno ozbiljno veliko preduzeće, pogotovo ako uzmemo u obzir projekte koji su planirani za naredni period, a to su izgradnja termoelektrane, cementare i kamenoloma. Dodaje da će Rudnik zajedno s opštinom učestvovati i u izgradnji turističkih potencijala, koji su značajni, kako je istakao, u njihovoj opštini. Uspjeli su, kako kaže, investirati i oko 130 miliona KM u rudnik u zadnjih 12 godina, a već u ovoj godini imaju 11 miliona KM investicija. “Investicije uglavnom radimo iz amortizacije, koja je oko 9-10 miliona, i dobiti, koja je u prosjeku godišnje preko tri miliona. Potpomognemo se negdje i kreditom”, rekao je Čeragić i dodao da je u ovoj godini primljeno 256 novih radnika u

Rudnik i da vjeruje da će u narednom periodu biti mjesta za još radnika. Od 1994. do 1999. godine RMU Banovići je poslovao u sastavu preduzeća Rudnici uglja Tuzla, u kojem su bili Rudnik Kreka, Rudnik Đurđevik i Rudnik Banovići.



“Mi smo 1998. godine zatražili izlazak iz tog zajedničkog preduzeća zbog propadanja rudnika, jer smo spali na dva kamiona i bili bez ikakvih investicija. Bilo nam je jasno da bi bez promjene situacije rudnik za godinu ili dvije potpuno propao i bilo bi ga nemoguće podići. U to vrijeme su rađene i neke studije o prestrukturiranju i zaključeno je da je rudnik besperspektivan i da ga treba zatvoriti. Međutim, mi najbolje poznajemo lokalnu zajednicu, jer ne bi bilo ni lokalne zajednice da nema rudnika i sve što se događa u Banovićima događa se zbog rudnika. Tokom 2001. godine Alijansa za promjene je uzela rudnik i na čelo je došao drugi direktor iz SDP-a. Oni su tri godine životalili i ostvarili su minimalne investicije od 4,5 miliona KM. Uspjeli smo 2004. godine uvjeriti vlast, koja se u međuvremenu promijenila, i u maju te godine došli smo na čelo Rudnika. Brzo smo uspostavili ravnotežu i prvo što smo uradili jeste da smo ukinuli kompenzacije, jer ako iko zna prodavati ugalj, onda smo to mi. Tu godinu smo odmah završili pozitivnim rezultatom i zadržali smo nivo proizvodnje. Počeli smo plaćati PIO i druge poreze i negdje od 2006. godine plaćamo sve obaveze državi”, rekao je Čeragić.

Jeftinija i veća proizvodnja

U Rudniku ističu da će pokrenuti i proceduru nabavke transportnog sistema s drobilicama i da očekuju da time pojeftine i povećaju proizvodnju, kako bi do 2019. bili spremni dočekati termoelektranu, koja bi tad trebalo da počne s radom. Istovremeno, kako tvrde u Rudniku mrkog uglja Banovići, time bi snabdijevali i Blok 6 i Blok 5 u Tuzli, jer Blok 6 radi isključivo na mrki uglj, a Blok 5 do 25 posto na mrki, a ostalo na lignit iz Kreke.

D.K.



Obilježen veliki jubilej tuzlanske Solane...

130 godina "Solane" dd Tuzla

Radno i svečano obilježen veliki jubilej – Zahvalnost svima koji su doprinijeli razvoju Solane – Posebna zahvalnost caru Austro-ugarske monarhije Franzu Josefu, osnivaču Solane davne 1885. godine - "Pokrenimo proizvodnju i zaposlimo ljude a vi nas podržite, jer jedina šansa da se izbjegne dugoročna kriza je ekonomski rast"



Tuzlanska Solana je obilježila 130 godina postojanja. Radno i svečano. Pušten je u rad od najsavremenijih transportnih sistema u JI Evropi sa pripadajućim mostom-tunelom koji transportu je gotov proizvod od pogona pakovanja do novoizgrađenog visokoregalnog skladišta soli u dužini oko 300 metara. U sali Bosanskog kulturnog centra Tuzlanskog kantona Tuzla, upriličena je svečana ceremonija obilježavanja 130 godina rada. Kada je u pitanju novi transportni sistem, treba reći da on povezuje sve mašine za pakovanje kapaciteta 500 tona na dan čime će se obezbijediti funkcionalniji i ekonomičniji transportni sistem i ekološki čist pogon. Ovaj projekat izgradila je i na dan svečanosti u ruke menadžmentu Solane, po sistemu „ključ u ruke“, predala švajcarska firma „Stocklin“. Prema procjenama, ovaj će projekat imati uštede u troškovima skladištenja, prijevoza i transporta i do 40 procenata. Ova najnovija investicija Solana iznosila je 2,5 miliona KM. Kažemo najnovija, a treba se prisjetiti da je nedavno, tek prošle godine, u rad pušteno visokoregarno skladište, pa je sve zajedno to sada investicija od 14 miliona KM. Sve na radost i zadovoljstvo oko 400 zaposlenih u Solani. Značajan je podatak uz svečani trenutak da Solana d.d. Tuzla danas izvozi više od 80 odsto svojih proizvoda u zemlje regije i na tržište EU. Iz fabrike se preselilo u salu BKC TK Tuzla gdje je upriličena svečana ceremonija obilježavanja 130 godina poslovanja Solane dd Tuzla. Prisustvovali su visoki zvaničnici iz Bosne i Hercegovine, Tuzlanskog kantona i Grada Tuzle, predstavnici partnerskih privrednih subjekata iz zemlje i inostranstva. **“Solana d.d. Tuzla recept je uspješnog poslovanja koji bi drugi trebali da prepišu. Malo je kompanija koje se mogu pohvaliti ovako dugom tradicijom uspješnog poslovanja. Podsjetimo se da je Solana d.d. bila u problemima koje danas imaju određene firme s područja TK, ali je promjenom rada i poslovnom politikom Solana postala jedan od najuspješnijih privrednih kolektiva na području TK”**, rekao je na svečanosti Bego Gutić premijer Tuzlanskog kantona.

Obraćanje Izudina Kapetanovića generalnog direktora Solane na svečanosti u BKC TK Tuzla, nikoga nije ostavilo ravnodušnim. Govor pun emocija, istorijskih podataka, informacija vezanih za aktuelni momenat firme na čijem je čelu. Direktor Kapetanović pozdravio je solare, čestitao im veliki jubilej, zahvalio se svima koji su u 130 godina dali veliki doprinos u radu i razvoju Solane, posebno, caru Austro-ugarske monarhije Franzu Josefu, osnivaču Solane davne 1885. godine. **“U posljednjih 10 godina u Solani smo proizveli 1.200.000 t soli, isto toliko i prodali. Ostvarili smo prihod od ¼ milijarde KM. Proizvodnju i prodaju, ali i plate povećali smo više od dva puta, izvozimo preko 85 % soli. Oko 200 miliona KM platili smo za osnovne sirovine, ambalažu i plate. Zaposlenicima je isplaćeno kroz bruto plaće oko 70 miliona KM. Uspjeli smo u pet godina vratiti dugovanja od 20 mil KM i investirati oko 30 mil KM. Da je država kao prije tridesetak godina zaštitila svoje bijelo zlato ostvarili bismo prihod od skoro milijardu KM. Iskustva iz Solane mogu biti lekcija kako se posrnula firma podigla poput feniksa. Ona je čudo bosanskog otpora i bosanskog inata u vremenima poslijeratnog oporavka i svjetske ekonomske krize. Od stabilizacije prema ekspanziji prošli smo težak put. Više nego ikada, naš razvoj je bio zasnovan na znanju, na inovacijama i na svjetskim iskustvima. Nažalost, mnoge firme u Bosni i Hercegovini nisu imale ovaj put. U Bosni i Hercegovini imamo neuposlene kapacitete, nezaposlene ljude, neiskorištene prirodne resurse i finansijski potencijal zamrznut strahom investitora, politikom nestabilnosti i nesigurnosti, te finansijskim špekulacijama. Poručujemo vlastima da radimo na najvažnijem projektu: pokrenimo proizvodnju i zaposlimo ljude a vi nas podržite, jer jedina šansa da se izbjegne dugoročna kriza je ekonomski rast”**, kazao je, između ostalog, Izudin Kapetanović generalni direktor Solane.

D.K.



Održan je i 4. po redu sajam “Zdravo – Domaće – Prirodno” u Zaječaru...

Bosna i Hercegovina u Zaječaru

Predstavljena Privreda TK - Još jedan nastup na međunarodnom sajmu - Predstavljeno više od 250 izlagača - Zajednički nastup pod zastavom Bosne i Hercegovine



Ako je do sada za sajam u Zaječaru, baš kao i za sajam u Virovitici koji se održava početkom godine, značilo da je sajam sa dušom, od ove godine za sajam na istoku Srbije, koji na određeni način čini završnicu sajamskih manifestacija u regionu, znači da ima i dušu i srce. Kako drugačije okarakterisati jednu sajamsku manifestaciju koja već na svom četvrtom izdanju postigne broj od 250 izlagača, čak duplo više nego prethodne godine. Šta reći za organizovanje jedne konferencije predsjednika regionalnih privrednih komora, kad napunite salu predsjednicima i predstavnicima brojnih komora iz Srbije, Hrvatske, Bosne i Hercegovine, Rumunije, Bugarske, Grčke!? Kako drugačije ocjene dati za sve ono što se u prvim danima oktobra dešavala u Zaječaru nego vrhunski, profesionalno, više nego uspješno. Potpisani su i sporazumi o saradnji što upućuje na to da se gleda dugoročno, da se želi i narednom periodu raditi, povezivati, družiti i jačati komorski sistem regije. Da, upravo su događaji u Zaječaru potvrda snage komorskog sistema ako se obavezema i aktivnostima pristupa sa jasno zacrtanim ciljevima usmjerenim ka pružanju pomoći, podrške, servisa privedi. Nakon tri dana druženja sa proizvođačima, sa komorskim radnicima a sve u savršenoj organizaciji vrhunski uklopljenog i posloženog tima Regionalne privredne komore Zaječar na čelu sa predsjednikom Dejanom Tošićem, mnogo je nas komorskih uposlenika koji se vraćamo sa uvjerenjem da će komorski sistem prevazići trenutne poteškoće, da će opstati i biti jači, treba se ugledati na uspješne...A uspješno je bilo “Zdravo – Domaće – Prirodno”. Hvala i pozovite nas i dogodine. Dolazimo...

Uspješno je bilo i za Kantonalnu privrednu komoru Tuzla, te komorski sistem u Bosni i Hercegovini. I ovoga puta je u okviru zajedničke sajamske postavke pod nazivom “Privreda TK”, predstavljeno oko dvadeset firmi članica Komore. Tema izlaganja

bila je prezentacija proizvodnog programa firme “Čokoladni svijet” iz Tuzle, nove članice Komore. Ono što je značajano a što bez potrebe za skromnošću, pripisujemo zaslugama i napordima komore Tuzla, jeste jedan nesvakidašnji i, mora se priznati, veoma rijedak način predstavljanja firmi i komora iz Bosne i Hercegovine. Naime, nakon što je naša ideja podržana od strane uposlenika Privredne komore USK na sajmu Ekobis u Bihaću i nakon što smo naišli na spremnost uposlenika u RPK Zaječar da se ta ideja sprovede u djelo, veliko je zadovoljstvo istaći da je konačno sve ono što stiže iz naše zemlje na jedan međunarodni sajam, bilo objedinjeno i izgledalo složeno. Na jednom mjestu, u odvojenom dijelu sajamske hale, pod jednom zastavom i pod natpisom “Bosna i Hercegovina”, izlagali su i predstavili se putem komora, turističkih agencija, razvojnih agencija, privrednici iz cijele BiH. Bilo nas je iz Banjaluke, Čelince, Sarajeva, Doboja, Bihaća, Brčko Distrikta, Tuzle. Raduje nas činjenica da se to desilo, jednako kao što nas raduje i to što je ideja iz Tuzle podržana i realizovana, a i dalje nas brine što takva ideja ne dolazi iz Privredne/Gospodarske komore FBiH ili Vanjskotrgovinske komore. No, nadamo se da će vrijeme pred nama donijeti praksu zajedničkih sajamskih nastupa i predstavljanja roba i usluga iz Bosne i Hercegovine. Ako nigdje drugo, ono na 5. sajmu “Zdravo – Domaće – Prirodno”, dogodine u Zaječaru...



Pripremio: Dino Kalesić



Obraćanje Dejana Tošića, predsjednika RPK Zaječar...

“Sajam s dušom” - “zdravo-domaće-prirodno”

Predstavljena Privreda TK - Još jedan nastup na međunarodnom sajmu – Predstavljeno više od 250 izlagača – Zajednički nastup pod zastavom Bosne i Hercegovine

“Poštovani učesnici i posetioci... Uvaženi gosti, dragi prijatelji... Pre svega želeo bih da Vas pozdravim u ime RPK Zaječar i u svoje lično ime.

Na samom početku bih naglasio da Komorski sistem postoji duže od 150 godina a Regionalna privredna komora Zaječar, kao servis privrede više od 50. Naš osnovni cilj je biti servis, odnosno pravi PARTNER privredi. Jedan od najboljih načina sigurno je i organizacija ovakvih vrsta manifestacija, tj. sajmova, gde se na jednom mestu prezentuje sve ono najbolje što neka opština ili grad imaju u svojoj ponudi, kako u turizmu, poljoprivredi, tako i u privredi uopšte.



RPK Zaječar po četvrti put samostalno organizuje međunarodni sajam „Zdravo-domaće-prirodno“. Prošlogodišnji Sajam je okupio preko 100 izlagača iz Srbije, Bugarske Rumunije, BiH i Slovenije i privukao pažnju brojnih posetilaca iz Zaječara, Timočke Krajine, Bugarske i Rumunije.

Ovogodišnji Sajam je podignut na još viši nivo – zahvaljujući brojnim realizovanim aktivnostima i ostvarenim kontaktima u prethodnom periodu, uspeli smo da ostvarimo cilj postavljen prošle godine – da imamo oko 250 izlagača iz zemlje i inostranstva. Raznovrsnost i kvalitet izloženih proizvoda impresionira, u šta ćete se i sami uveriti obilaskom štandova..

„Sajam s dušom“ kako su ga neki okarakterisali prošle godine, je međunarodnog karaktera i sa zadovoljstvom mogu da kažem da imamo goste i izlagače iz Slovačke, Danske, Italije, Grčke, Rumunije, Bugarske, Slovenije, Hrvatske, Bosne i Hercegovine, kao i iz svih krajeva Srbije, što nas obavezuje da naredni budu još bolji i zapaženiji. Podsetio bih vas da je oktobar- mesec promocija pravilne ishrane i fizičkih aktivnosti, tako da nije slučajnost što naš Sajam organizujemo baš sada. Ove godine tema je Socijalna

zaštita i poljoprivreda čime se akcenat stavlja na individualne proizvođače hrane i kvalitet njihovih proizvoda čime se naš Sajam uklapa u okvire Svetskog Programa za hranu UN-a. Na kraju bih se zahvalio na pomoći u organizaciji Sajma svim izlagačima iz zemlje i inostranstva, Nacionalnoj agenciji za regionalni razvoj, koja nam je ponovo besplatno ustupila kompletan prostor za sajamsku izložbu i prateće programe, kao i mojim kolegicama kolegama, bez kojih bi bilo skoro nemoguće organizovati ovakvu vrstu manifestacije, koja je od ogromnog značaja kako za grad Zaječar tako i za Timočki region. Zahvalio bih se i kolegama iz svih privrednih komora kako iz Srbije tako i iz regiona i EU, Centru za kulturu i turizam Zaječar, TO Kladovo, TO Žagubica i TO Boljevac, Gradu Zaječaru, ostalim opštinama Timočke krajine, zaječarskom i borskom Upravnom okrugu koji su se odazvali našem pozivu i doprineli popularizaciji našeg sajma. Hvala svima koji su prepoznali regionalni značaj Privredne komore Zaječar i međunarodni značaj našeg Sajma. Veliko hvala i svim novinarima i medijima koji su pratili Sajam od samog početka njegovog održavanja.

HVALA I JOŠ JEDNOM - DOBRO DOŠLI!!!!



D.K.



Susret predsjednika regionalnih komora u Zaječaru

Potpisan Sporazum o saradnji Komora Zaječar i Tuzla

Nakon Celja i Splita, sastanak u Zaječaru - Brojni predstavnici komorskog sistema iz Hrvatske, Srbije, Bosne i Hercegovine, Crne Gore, Slovačke, Bugarske, Rumunije, Grčke - Potpisani sporazumi o saradnji sa Suboticom, Splitom i Tuzlom

Regionalna privredna komora Zaječar je u okviru sada već tradicionalnog međunarodnog sajma tradicionalnih domaćih proizvoda Zdravo-domaće-prirodno, organizovala i susret predsjednika regionalnih komora. Nakon ovakvih sastanka u Celju i Splitu, Zaječar je okupio predstavnike komorskog sistema iz Hrvatske, Srbije, Bosne i Hercegovine, Crne Gore, Slovačke, Bugarske, Rumunije, Grčke. Dejan Tošić predsjednik Regionalne privredne komore Zaječara i prvi u izvanrednom timu koji je iznio organizaciju sajma i sastanka, na početku je predstavio potencijale Timočke krajine i Regionalnu privrednu komoru Zaječar. Timočka je krajina, inače, najmanje naseljena regija u Srbiji, s 245.000 stanovnika. Površina joj obuhvaća 8 % ukupne površine Srbije, a glavne djelatnosti su poljoprivreda, energetika i rudarstvo. Na području regionalne komore Zaječar, registrirano je 7.465 privrednih subjekata.



Potpredsjednik Privredne komore Srbije Miroslav Miletić predstavio je modernizaciju komorskog sistema prema austrijskom modelu te je istakao nove usluge komore Srbije. Naime, komora Srbije godinama je bila na dobrovoljnom članstvu, a to se, prema njegovim riječima, najviše negativno odrazilo na regionalne komore koje, bez prihoda i bez stručnoga kadra, nisu bile dovoljna potpora cjelokupnoj privredi. Tkako je istakao dopredsjednik Miletić, takav dobrovoljni sistem organizacije pokazao se kao neodrživ, što će uskoro rezultirati ponovnim prelaskom na obavezno članstvo a regulisano novim zakonom o komori. Kao jednu od značajnijih novosti u modernizaciji komorskih usluga istakao je pomoć privrednicima pri pisanju EU projekata te internacionalizaciju.



Na skupu su govorili još i Ismet Pašalić predsjednik Privredne komore USK, Nemanja Vasić predsjednik Vanjskotrgovinske komore BiH, Goran Račić predsjednik područne privredne komore Banjaluka, Veselin Panić predsjednik PK Brčko Distrikta, Katija Bulić predsjednica Županijske komore Split, Goran Jović predsjednik RPK Leskovac, Vladan Paunović načelnik zaječarskog upravnog okruga. Sporazum o saradnji na ovom skupu su potpisale turističke zajednice Zaječara i Unsko sanskog kantona. Sa Regionalnom privrednom komorom Zaječar Sporazum o saradnji potpisale su Regionalna privredna komora Subotica, Županijska komora Split i Kantonalna privredna komora Tuzla. Bila je ovo još jedna prilika da se istakne važnost povezivanja, razmjene iskustava i informacija, posebno kada je riječ o komorama čije su zemlje članice EU, te zajedničkog nastupa na trećim tržištima. Sporazumi će učvrstiti veze između privrednika iz regija koje predstavljaju komore potpisnice a što bi se u narednom periodu trebalo odraziti u razmjeni informacija, zajedničkim nastupima na značajnim sajamskim manifestacijama, raznim vidovima promocija i zajedničkih aktivnosti.



D.K.



Značajne sajamske manifestacije...

Nastup na sajmu "Ekobis 2015" u Bihaću

"Održivi razvoj u ruralnim područjima" tema Sajma - EKOBIS je postao novi poslovni proizvod Unsko-sanskog kantona - Komora predstavila svoje članice na izložbenom prostoru, poklonu Privredne komore Unsko sanskog kantona



U Bihaću je održan 13. međunarodni ekološki sajam "EKOBIS 2015" sa temom održivi razvoj u ruralnim područjima. Raduje činjenica da je u općenito teškoj situaciji za privredu i privrednike, organizator uspio okupiti više od 250 izlagača iz 9 zemalja na oko 10 000 m² otvorenog i zatvorenog sajamskog prostora a zabilježeno je i više od 10.000 posjetilaca na sajmu. Zato organizatoru, vrijednoj ekipi u Privrednoj komori Unsko-sanskog kantona još jednom iskrene čestitke za vrhunsku organizaciju. Na čelu te vrijedne ekipe je dr.sc. Ismet Pašalić koji nije krio zadovoljstvo još jednim uspješnim sajmom. Istovremeno, svaki medijski istup se koristio i da se već sada najave pripreme za sajam "EKOBIS 2016", na kojem će, nadamo se, kao i u većem dijelu dosadašnjih, biti prisutna i "Privreda TK", zajednička sajamska postavka koju organizuje Kantonalna privredna komora Tuzla za svoje članice. Ne može i ne smije se ovdje ne pomenuti da je to omogućeno prije svega susretljivošću organizatora, jakim vezama unutar komorskog sistema pa je PK USK i ove godine za članice Komore Tuzla poklonila izložbeni prostor na kojem se ponovo, kao i prethodnih godina, predstavilo nešto manje od 30 firmi a među njima i Fabrika deterdženata "Dita" Tuzla, što je privuklo posebnu pažnju. Uz dobru organizaciju, zanimljive izložbene postavke, dobru posjetu, sajam je karakterisao i kvalitetan sadržaj pratećih programskih aktivnosti po čemu je ovaj sajam i prepoznatljiv i najbogatiji u regiji. Održana je međunarodna Konferencija o regionalnoj suradnji "Održivi razvoj u ruralnim područjima"; dvodnevna Konferencija o energetske efikasnosti "Dani energije

Bihać"; Stručna konferencija "Šumarstvo i drvoprerađiva USK"; Večer regionalnog partnerstva; Poslovni susreti privrednika USK i Republike Slovenije na kojima je sudjelovao ambasador Republike Slovenije u BiH Nj.E. Iztok Grmek i ekonomski savjetnik u Veleposlanstvu Slovenije u Sarajevu Gregor Preskar; predstavljeni projekti Fonda za zaštitu okoliša F BiH koje je predstavio direktor Fonda Safet Harbinja; te mnogobrojna predavanja, okrugli stolovi, prezentacije i promocije, prikazan naučno-promotivni film u organizaciji Nacionalnog parka "Una" "Tragom medvjeda zvanog Ljutoč"; te održano finalno natjecanje već tradicionalnog EKO-KVIZ-a "Una i ekologija - EKOBIS 2015". Na sajmu su do sada promovirani izlagači iz BiH, Hrvatske, Srbije, Crne Gore, Slovenije, Austrije, Njemačke, Češke, Slovačke, Italije, Francuske, Turske, Finske i Izraela. Sajam "EKOBIS" je manifestacija ekologije, ekoturizma i ekološke industrije koju organizuje Privredna komora Unsko-sanskog kantona, sada već 13 godina, veoma uspješno i za svaku pohvalu.

O ovom značajnom projektu je s ponosom na ceremoniji otvaranja govorio i predsjednik Pašalić: "Sajam EKOBIS je pokrenut je 2003. godine, nalazeći uporište u postojećim resursima ovog područja, kao takav predstavlja viziju budućeg razvoja kao unikatna, međunarodna, poslovna manifestacija sajamskog, selektivnog karaktera, vezana za ekološke tehnologije uopće. Zbog specifičnog načina koncepcije EKOBIS je postao novi poslovni proizvod Unsko-sanskog kantona, moderna poslovna manifestacija za koju iz godine u godinu pokazuju sve veći interes, kako domaćih tako i stranih izlagača i poslovnih ljudi, a ovo potvrđuje i činjenica da su za Sajam stigla priznanja za najbolji regionalni projekt na principima održivog razvoja u jugoistočnoj Evropi", kazao je dr. sc. Ismet Pašalić, predsjednik Privredne komore USK. Istakao je da se u ulozi generalnog pokrovitelja po prvi put pojavila Vlada USK, a sajam su pomogli i podržali Vanjskotrgovinska komora BiH, Federalno ministarstvo

poljoprivrede, vodoprivrede i šumarstva, Fond za zaštitu okoliša Federacije BiH, te Grad Bihać. Partner Sajma je ove godine bila Karlovačka županija iz Republike Hrvatske. Predstavnici ovih institucija i ustanova su također, biranim riječima govorili o ovoj manifestaciji na svečanom otvaranju. U takvom duhu, obraćanjima punim poštovanja za ono što rade predsjednik Pašalić i ekipa iz Privredne komore USK, istovremeno u prijateljskom, opuštenom tonu, protekla je Večer regionalne partnerske suradnje, veoma značajna događaj u okviru pratećeg programa Sajma. Na ovoj večeri je upriličen promotivni film o razvojnim mogućnostima i razvojnim projektima Grada Bihaća, te svečano obilježene 10-godišnjice suradnje i potpisivanja Sporazuma o suradnji sa HGK Županijskom komorom Bjelovar, Regionalnom privrednom komorom Kikinda, Industrijskom i trgovačkom komorom Čongrad, Segedin Mađarska i Privrednom komorom Brčko Distrikta, te 5 godina od potpisivanja Sporazuma o saradnji sa RPK Zrenjanin. Ne preostaje nam ništa drugo do da se nadamo dobroj volji organizatora i pozivu za naredni, 14. po redu sajam "EKOBIS" 2016. godine.



"PRIVREDA TK"

Na sajamskoj manifestaciji u Bihaću, zajedničku postavku pod nazivom "Privreda TK" predstavljali su slijedeći privredni subjekti: "Borplastika Eko" doo Tuzla, "Belladona" Tuzla, "Corn Flips" Srebrenik, Fabrika deterdženata "Dita" Tuzla, "Fana" doo Srebrenik, "Golden tours" Tuzla, "ELLE travel" Tuzla, "Relax" Tuzla, "Gradačački



sajam" doo Gradačac, "Helios" dd Banovići - Industrija domoopreme, "Herceg" doo Srebrenik, "Imel" doo Lukavac, "Omega" dd Živnice, "Piemonte" doo Tuzla, "Pivara" dd Tuzla, "PRO PAK" doo Tuzla, "Seif" doo Kalesija, "Solana" dd Tuzla, OPG "Veselić" Špionica, Turistička zajednica Tuzlanskog kantona, "Tehnopak" Tuzla, "Porta Naturae" doo Srebrenik, "Eko život" Tuzla, "Voćni rasadnik" doo Srebrenik, "Xella BH" Tuzla, Općina Tuzla, Vlada Tuzlanskog kantona.

D.K.

ODRŽAN 22. GENERALNI BH SAJAM "ZEPS 2015"



U Zenici je održan 22. generalni bh sajam ZEPS 2015 na kojem je svoje proizvode i usluge 10.000 metara kvadratnih sajamske površine predstavilo više od 500 izlagača iz više od 20 zemalja. Na ovom veoma značajnom sajmu, Privreda TK nije predstavljena jer se način organizovanja sajamske postavke koju svake godine upriliči Vanjskotrgovinska komora BiH, ne uklapa u želje i navike sajamskih nastupa firmi članica Kantonalne privredne komore Tuzla. Tek, upriličena je posjeta sajmu na dan otvaranja. A kao i svake godine, svečanosti otvaranja sajma su prisustvovali brojni izlagači, privrednici, predstavnici vlasti, te mnoge druge ugledne ličnosti grada Zenice, Zeničko-dobojskog kantona, Bosne i Hercegovine. Značajno je kako se ovogodišnji Sajam razlikovao od prethodnih po tome što je čast da ga proglasi otvorenim, pripala privredniku. Otvarajući sajam Rusmir Hrić, prvi čovjek AS Groupe, kazao je da sama činjenica da ovogodišnji sajam otvara predstavnik privatnog sektora i proizvodnje govori da se nešto počelo mijenjati u našim glavama. "Predugo je privatni sektor bio u drugom planu. Svako mora preuzeti dio svoje odgovornosti. Privatni sektor, odnosno preduzeća, moraju stvarati novu vrijednost, poslovati pozitivno, ostvarivati profit. Ma kakva bila naša privredna zbilja,

privatna preduzeća u njoj moraju prepoznati prilike i mogućnosti, a ne samo probleme. Preduzeća moraju poštovati zakone države u kojoj posluju, a s druge strane država mora efikasno odigrati ulogu regulatora. ZEPS je najbolja prilika u Bosni i Hercegovini da se predstavimo, upoznamo i na koncu da odmjerimo svoja dostignuća u odnosu na druge kompanije, regije i zemlje. Također smatram da je jako važno da svi podržimo koncept Kupujmo domaće. Kupovinom domaćih proizvoda i korištenjem domaćih usluga imamo svi veću šansu da uspijemo. Kada kažem svi, smatram i apelujem da Kupujmo domaće - Gradimo BiH mora postati državna priča, tj. da iza nje treba stati država. Investirati u BiH se isplati. Upravo naše investicije AS Grupacije su se pokazale vrlo uspješnim. Stoga bi pozvao druge domaće, ali i inozemne investitore da ulažu u BiH jer je ovdje uspjeh itekako moguć. Upravo je ZEPS kao najveći sajam u BiH pravo mjesto da se oni uvjere u potencijale bh. privrede", kazao je Hrić. Na ceremoniji otvaranja Sajma, goroio je i Fadil Novalić premijer FBiH. „I ova akcija Prepoznaj domaće, Budi ponosan, koju podržava Vlada Tuzlanskog kantona, vjetar je u leđa ovakvim manifestacijama. Ona jasno ukazuje na prednosti domaće proizvodnje i korištenja domaćih usluga" rekao je, između ostalog, Novalić. Bego Gutić premijer Tuzlanskog kantona, podržao je domaće izlagače na sajmu ZEPS, posjetio je nekolčinu preduzeća koja su organizovala samostalne nastupe. Na 22. generalnom bh sajmu ZEPS 2015 dodijeljena su priznanja izlagačima u dvije kategorije. U prvoj kategoriji, po odluci žirija, dodijeljena su priznanja za proizvod, kolekciju proizvoda i promociju, te najviše priznanje Grand Prix Ruža ZEPS-a, pri čemu su u konkurenciji bili svi izlagači, osim izlagača iz oblasti prehrane za proizvod i kolekciju proizvoda.

Žiri ZEPS-a je jednoglasnom odlukom dodijelio ukupno 18 ravnopravnih priznanja. Za drugu kategoriju priznanja (medalje kvaliteta RUŽA ZEPS-a), u konkurenciji su bili proizvođači prehrambenih proizvoda i pića. Ocjenjivanje kvaliteta prehrambenih proizvoda izvršeno je prema proceduri propisanoj posebnim pravilnikom a na osnovu analize od strane Instituta za prehrambene tehnologije Poljoprivrednoprehrambenog fakulteta u Sarajevu, ocjene na degustaciji grupe potrošača i ocjene Žirija za dodjelu priznanja ZEPS-a. Na 22. Generalnom bh sajmu ZEPS 2015 za rangovano priznanje, Medalja

kvaliteta RUŽA ZEPS-a, kandidovali se proizvođači iz BiH sa 11 proizvoda koji su bili svrstani u nekoliko robnih grupa.

D.K.

14. MEĐ. SAJAM PRIVREDE "BRČKO 2015" 12. - 15. 11.



Privredna komora Brčko Distrikta i ove godine organizuje međunarodni sajam privrede/gospodarstva. To je mjesto i prilika da ostvarite svoje poslovne inicijative i unaprijedite poslovne mogućnosti. Kantonalna privredna komora Tuzla je uspostavila izvanredne međukomorske odnose sa Privrednom komorom Brčko distrikta na osnovu kojih je i ove godine obezbijeden izložbeni prostor u skladu sa mogućnostima organizatora. S tim u vezi vas pozivamo naše članice, da se što prije opredijelite, odlučite i obavijestite nas o vašoj odluci, odnosno, da li ćete i u kojoj formi biti prisutni na sajmu u Brčkom. Pozivamo vas da budete sastavni dio zajedničke postavke privrede Tuzlanskog kantona i na ovoj značajnoj sajamskoj manifestaciji na kojoj već tradicionalno nastupa i Privreda TK. Kantonalna privredna komora Tuzla će kao u prethodnom periodu organizovati nastup na sajmu za firme članice Komore bez dodatnih troškova izlagača. S tim u vezi, privredni subjekti će kao i na prethodnim sajamskim manifestacijama biti predstavljeni kataloški, uzorcima, roll up banerima, vizit karticama, brošurama, organizovanim prezentacijama, promocijama i degustacijama. Pozivamo vas da prihvatite naše pozive i u narednom periodu doprinesete uspješnom predstavljanju privrede Tuzlanskog kantona na svim sajamskim manifestacijama na kojima Kantonalna privredna komora Tuzla bude organizovala zajednički nastup. Molimo da nam što prije javite vaš odgovor kako bismo mogli izvršiti prijavu na sajmu.

Kontakt osoba je Dino Kalesić: 061/164-311
- dino@kpktz.ba.

D.K.



Novosti iz firme "Omega" doo Živinice...

Beko Shop Sarajevo i Goražde

Otvoren 10. Beko shop u BBI centru - Prvi Beko shop u Goraždu - Ukupno 25 Beko shopova u BiH

Ekskluzivni „Beko shop“ otvoren je u Sarajevu, u BBI centru, Trg djece Sarajeva. Beko shop otvara firma Omega d.o.o., koja je ekskluzivni zastupnik brendova Beko, Grundig i Blomberg za BiH. Ovo je 10. Beko shop u BBI centru. Beko shop se prostire na površini od 200 m² prodajnog prostora. Nalazi se na etaži -1 u tržnom centru BBI. U Beko shopu se može naći veliki asortiman BEKO samostojeće tehnike – veš mašine, mašine za suđe, sušilice, frižideri, zamrzivači, el.štednjaci, ugradna tehnika, lcd, plazma i klasični televizori, klima uređaji, audio/video tehnika, mali kućanski aparati i slično.



U ponudi ima preko 1000 različitih proizvoda. Pouzdanost, kvalitet u izradi, energetske učinkovitosti i velike vrijednosti, samo su neki od razloga koji su sve više i više presudni kod odabira Beko kućanskih aparata. Beko svake dvije godine na tržište lansirao novitete. Ove godine su stigle nove linije Beko mašina za suđe, samostojeće i ugradne, nekoliko modela kombinovanih perilica/sušilica Beko te pećnice Beko. Posebna ponuda su Beko mašine za veš sa ProSmart Motorom, i dajemo 10 godina garanciju na motor mašine. Ovaj motor je 3 puta tiši i 50% ušteda energije. Pro Smart Inverter tehnologija pruža povećanu efikasnost i pouzdanost trošeći manje energije uz produženje životnog vijeka uređaja. Unikatan i patentirana kontrola balansa te kombinacija različitih pokreta osigurati će superiorno iskustvo. Bekova životna filozofija i pogled na svijet bazirani su na stvaranju pametnih rješenja za Vas. Tu smo kako bismo Vašu svakodnevnicu učinili boljom i ugodnijom za naše proizvode. Naš prvi cilj je da Vam pomognemo da na najbolji mogući način. Pametna rješenja daju Vam proizvode koji štede energiju, vodu i vrijeme. Pored toga, nudimo dizajne koji vode računa o veličini Vašeg životnog prostora i lakoći upotrebe naših proizvoda uprkos modernim tehnologijama koje sadrže. Beko se trenutno prodaje u preko 100 država a Beko proizvodi se koriste u milionima domaćinstava širom svijeta. Beko je dobitnik nekoliko međunarodnih nagrada za kvalitet, inovativan dizajn, pouzdanost i za zelenu tehnologiju. Beko proizvodi su preporučeni od vodećih potrošačkih magazina na Evropskom tržištu, zahvaljujući svojoj velikoj energetske učinkovitosti i visokim performansama, što je uzrokovalo da budu dio „Best Buy“ kategorije proizvoda.



Svi Beko proizvodi zadovoljavaju uslove o očuvanju životne sredine i proizvedeni su u skladu sa ISO 4001 standardom. Beko je dobitnik nekoliko međunarodnih nagrada za kvalitet, inovativan dizajn, pouzdanost i za zelenu tehnologiju kao što su: Energy Saving Trust, Stiftung Warentest (StiWa), Plus X, iF Design i Red Dot Design nagrade. Beko proizvodi su preporučeni od vodećih potrošačkih magazina na Evropskom tržištu, zahvaljujući svojoj velikoj energetske učinkovitosti i visokim performansama, što je uzrokovalo da budu dio „Best Buy“ kategorije proizvoda. U 2011, kao rezultat ATLETE (Appliance Testing for Energy Label Evaluation), projekat proveden od strane CECED (European Committee of Domestic Equipment Manufacturers) zajedno sa komisijom EU, Beko postaje jedan od rijetkih brandova koji su certificirani kao nositelj potpuno tačnih informacija u kategoriji Evropskog načina utroška energije. Beko proizvodi su preporučeni od strane vodećih potrošačkih magazina na Evropskom tržištu zahvaljujući svom visokom energetske učinku i visokim performansama. Jedna od prednosti kod kupovine Beko uređaja jeste jaka servisna mreža, sa preko 50 ovlaštenih servisa u BiH. Besplatna dostava, unošenje u stan, kupovina sa popustima, beskamatni krediti, kupovina na rate samo su neki od razloga zašto posjetiti Beko shop. Ekskluzivni „Beko shop“ otvoren je i u Goraždu, ulica Maršala Tita br.1. Ovo je prvi Beko shop u Goraždu, a 25. u BiH. Beko shop se prostire na površini od 200 m² prodajnog prostora.

D.K.



Zvanično pokrenuta kampanja...

“Prepoznađ domaće - budi ponosan - Made in BiH”

„Pridružite nam se jer ova akcija svakako zasluđuje našu zajedničku pozornost ali i nudi konkretne indikatore kao što su nova zapošljavanja, sigurniji penzioni fondovi, bolja zdravstvena zaštita i kvalitetnije obrazovanje. Ovo nije oglašivačka kampanja nego poziv ili edukativna akcija čijim pojedinačnim prihvatanjem vlastitog učešća se pridružujemo najuspješnijim kompanijama koje iskazuju svoju društvenu odgovornost prema vlastitoj zemlji”



Konferencijom za medije u prostorijama Privredne komore Tuzlanskog kantona zvanično je započeta medijska kampanja „Prepoznađ domaće – Budi ponosan – Made in BiH”. Cilj kampanje, koju realizira marketinška agencija Colosseum Tuzla u saradnji sa Kantonalnom privrednom komorom i Vladom Tuzlanskog kantona je podizanje svjesnosti građana o bitnosti kupovine i odabira domaćih proizvoda pri kupovini kao i kreiranje pozitivnijeg ambijenta za poduzetništvo u Tuzlanskom kantonu. U ekonomskom sistemu BiH neophodno je sve njene građane podsjetiti ili naučiti koji su benefiti u kupovini i odabiru domaćih proizvoda i usluga ili kako ustvari funkcioniše fiskalni sistem naše države, rečeno je. Održivi razvoj je politička platforma EU i razvijenog svijeta i na toj strategiji se temelji dugoročno privredno gospodarska platforma opstanka. Kompanije u BiH i njihovi menadžmenti su danas ostali na „suhom”. Domaća proizvodnja je vrlo slabo zaštićena i proizvođači su prepušteni uvoznoj konkurenciji upitne kvalitete i roba. Opšti medijski ambijent najčešće je stvaranje negativnog okruženja ističući pojedinačne negativne primjere, ali i stvarajući opštu lošu sliku o poduzetnicima. Model liberalne ekonomije nemilosrdno uništava male i slabe lokalne proizvođače rečeno je na konferenciji, a Zlatko Berbić, vlasnik agencije Colosseum dodaje „da je potrebno pokrenuti suprotan proces tzv. cirkularne EQ-nomije, gdje bi se analitički reciklirala svaka aktivnost i učinila da ojača domaće proizvođače koristeći sve resurse od edukacije lokalnog stanovništva do maksimalnog energiziranog povezivanja”.



„Pridružite nam se jer ova akcija svakako zasluđuje našu zajedničku pozornost ali i nudi konkretne indikatore kao što su nova zapošljavanja, sigurniji penzioni fondovi, bolja zdravstvena zaštita i kvalitetnije obrazovanje. Ovo nije oglašivačka kampanja nego poziv ili edukativna akcija čijim pojedinačnim prihvatanjem vlastitog učešća se pridružujemo najuspješnijim kompanijama koje iskazuju svoju društvenu odgovornost prema vlastitoj zemlji”, zajednički je poziv svih subjekata uključenih u realizaciju kampanje.



Koncept ovog projekta je da se restrukturiranjem naše svakodnevne potrošnje, odabirom domaćih proizvoda i proizvođača, uz isti kvalitet ali uz malo pažnje, život u BiH može učiniti kvalitetnijim i perspektivnijim.

D.K.



Premijer TK posjetio GiPS...

Razgovor o unaprijeđenju javnog prijevoza

Nelegalan prijevoz veliko opterećenje – Vlada Tuzlanskog kantona će i dalje biti servis privredi – GiPS planira oko 5,5 miliona KM novih investicija - Podrška kampanji „Prepoznaj domaće, Budi ponosan, Made in BIH

Dosadašnje i plan budućih investicija, kao i problemi s kojim se u svom poslovanju susreće Gradsko i prigradsko saobraćajno preduzeće (GIPS) Tuzla bili su razlog posjete i tema sastanka članova Uprave ovog privrednog društva sa premijerom Tuzlanskog kantona Begom Gutićem. Članovi Uprave prezentirali su potencijale za dalji razvoj ovog preduzeća i javnog prijevoza u Tuzli, ali i probleme s kojim se susreću u svom poslovanju.



„Nelegalan prijevoz putnika kombijima i putničkim vozilima na području našeg kantona u znatnoj mjeri opterećuje rad GIPS-a i predstavlja prepreku daljem razvoju Društva i javnog prijevoza putnika uopće“ istakao je izvršni direktor GIPS-a Fuad Đulović. S tim u vezi premijer Gutić je članove Uprave GIPS-a upoznao da je Vlada već u proteklom periodu donijela Odluku i zadužila Ministarstvo unutrašnjih poslova, Kantonalnu upravu za inspeksijske poslove i nadležno Ministarstvo trgovine, turizma i saobraćaja, da se zajednički uključe u borbu protiv rada na crno, nelojalne konkurencije i drugih neregularnosti u oblasti javnog prijevoza putnika na području našeg kantona, i da te aktivnosti već polako daju rezultate. „Vlada TK će i dalje biti servis privredi. Stvaranje povoljnijeg poslovnog ambijenta za poslovanje privrednih subjekata koji redovno izvršavaju svoje obaveze, kao i za otvaranje novih poslovnih subjekata, je prioritet u radu ove Vlade“ istakao je premijer Gutić dodajući da je obaveza Vlade da kao regulator na tržištu nadzire provođenje pozitivne zakonske regulative. Ovom prilikom također pohvaljena su investicijska ulaganja GIPS-a u proteklom periodu i plan investicija u bliskoj budućnosti, a što će nesumnjivo rezultirati boljom uslugom za one građane koji koriste javni prijevoz, ali i građane Kantona uopšte. Naime, kako je istakla generalna direktorica GIPS-a Mirela Atlić, GIPS je u proteklom periodu u infrastrukturu ovog društva investirao oko 1,5 miliona KM, a u naredne dvije godine planira se oko 5,5 miliona KM novih investicija. Osim toga, GIPS je finansijski podržao i kampanju „Prepoznaj domaće, Budi ponosan, Made in BIH“.




„Veoma brzo ćemo 30 autobusa koji saobraćaju zamijeniti sa 30 ekološki prihvatljivih CNG autobusa, što je investicija od oko 2 miliona KM. Oko 1,2 miliona planiramo investirati u novu CNG punionicu, a oko 2 miliona KM je vrijednost investicije izgradnje nove, savremene, autobusne stanice u Lukavcu“ rekla je Atlić. Premijer Kantona je izrazio zadovoljstvo dosadašnjim radom, te članovima Uprave, uz čestitke na dosadašnjim rezultatima, zaželio mnogo uspjeha u realizaciji planiranih aktivnosti.

D.K.



Iz Vlade Tuzlanskog kantona...

**PREMIJER GUTIĆ UGOSTIO
AMBASADORA MAKEDONIJE U BIH**



Ekonomska, kulturna i politička saradnja Bosne i Hercegovine i Tuzlanskog kantona sa Makedonijom bila je glavna tema sastanka premijera Kantona Bege Gutića i Nj. E. Ramija Rexhepija Ambasadora Makedonije u Bosni i Hercegovini. Bosna i Hercegovina i Makedonija su prijateljske zemlje koje dijele značajan dio zajedničke historije i međudržavna saradnja već postoji. „Međutim ne možemo reći da smo u potpunosti zadovoljni intenzitetom i obimom te saradnje. Smatramo da postoji još puno prostora, u svim oblastima da se ta saradnja i dodatno proširi. Tuzlanski kanton ima dobro razvijenu infrastrukturu, postoji dovoljno kvalitetnih i uspješnih kompanija za veći protok roba u oba smjera”, rekao je ambasador Rexhepi. Istaknuto je da ekonomska diplomatija treba biti prioritet u radu svih državnih predstavništava i temelj dalje društvene saradnje. Ovom prilikom razgovaralo se i o stanju privrede i privatizacijskim procesima, stanju privrednih subjekata nakon privatizacije, te konstatovano da u ovoj oblasti postoje velike sličnosti. Ambasador Rexhepi je također ponudio pomoć koju Makedonija može pružiti Tuzlanskom kantonu u pogledu pojednostavljivanja procedura u oblasti registracije novih biznisa. Pomoć u ovom pogledu mnogo znači, posebno ako se ima u vidu da je Makedonija jedna od 5 najbolje rangiranih zemalja u svijetu u brzini i efikasnosti procedura za registraciju novih biznisa. To je reforma koju je Makedonija trebala i učiniti na svom putu pridruživanja Evropskoj uniji. Nakon sastanka u Uredu premijera, premijer Gutić i Ambasador Rexhepi su zajedno prisustvovali obilježavanju 130 godina poslovanja Solane u Tuzli.

**GARANTNI FOND OMOGUĆIO
ZADRŽAVANJE 2.100 POSTOJEĆIH
I STVORIO USLOVE ZA PREKO 600
NOVIH RADNIH MJESTA**



Vlada Tuzlanskog kantona prihvatila je na redovnoj sjednici, Informaciju o radu Garantnog fonda NERDA. Evaluacijom projekata podržanih kroz Garantni fond procijenjeno je da su ove investicije omogućile firmama da zadrže preko 2.100 postojećih radnih mjesta, te stvorile uslove za zapošljavanje preko 600 novih radnika. Naime, Udruženje za razvoj NERDA i Garantni fond su kroz partnerski odnos sa Sberbank d.d., BH, poduzetnicima omogućili lakši pristup finansijskim sredstvima, uz pojednostavljenu proceduru, fleksibilnije instrumente obezbjeđenja i povoljnu kamatnu stopu od 6,99 % uz rok otplate do 5 godina i mogućnost grejs perioda do 6 mjeseci. Pored toga, u proteklom periodu vrijednost multiplikatora je povećana sa 3 na 4, te je time vrijednost garantnog potencijala Fonda povećana i iznosi 5.833.000 KM. Bitno za istaći je i činjenica da je svaki poduzetnik koji je pristupio Garantnom fondu dobio kompletnu podršku vezanu za ispunjavanje aplikacije, izradu kratkog poslovnog plana i pripremu dokumentacije potrebne za pristup finansijskim sredstvima uopšte. Garantni odbor je odobrio 182 zahtjeva, od kojih je 130 dobilo sredstva, dok su ostali ili odbijeni od strane Kreditnog odbora banke ili su sami odustali. Razlozi odbijanja od strane Kreditnog odbora su nekalitetno obezbjeđenje ili nepovoljan kreditni rejting aplikanta, dok su razlozi odustajanja aplikanta dobijanje donatorskih sredstava ili jednostavno odustajanje od investicije zbog neisplativosti iste. Zaključno sa 20.09.2015. godine 130 klijenata je realizovalo kreditna sredstva ukupne vrijednosti 6.582.113,95 KM. Zahvaljujući maloj stopi delinkvencije od samo 0,85% i redovnim mjesečnim uplatama postojećih klijenata, Garantni fond se uredno obnavlja, što omogućuje njegov nesmetan rad. Do sada je ukupno naplaćeno 4.330.672,10 KM što znači da je potencijalnim klijentima zaključno sa krajem augusta ove godine na raspolaganju 3.581.567 KM. Inače Garantni fond rezultat je zajedničkih ulaganja Vlade TK sa 810.000 KM, Grada Tuzle sa 301.000 KM, Općine Kalesija sa 146.250 KM, NERDA-e sa 81.000 KM, Posavskog kantona i Općine Orašje sa po 50.000 KM i Općine Vlasenica sa 20.000 KM.

D.K.



Vijesti iz firmi članica Komore...

USPJEŠAN NASTUP PIVARE TUZLA NA ZEPS-U



Tuzlanska pivara, koja je ponosni vlasnik brendova Tuzlanski pilsner (pivo češke tehnologije), Erster pivo (pivo njemačke tehnologije), Tuzlanski kiseli (mineralna voda sa magnezijem), Panonska Ledena (Orange, Cola i Lemon), Premium program (crno pivo, radler lemon) i Laganese (Apfel schorle, jabuka), na ovogodišnjem ZEPS-u ima zanimljivu prezentaciju. Fahrudin Salihović, direktor Pivare Tuzla DD, ističe da je generalni BiH sajam prilika da se susretnu privrednici, ljudi iz biznisa, razmijene određena iskustva, a samim tim i da se dođe do novih kupaca. - Imamo najave određenih kupaca na ZEPS-u da će razgovarati sa nama oko saradnje. Zbog toga, ali i zbog samog susreta sa privrednicima sa kojima razmjenjujemo iskustva, mogu reći da je za nas već prvog dana ZEPS bio uspješan. Očekujemo da ćemo imati dobre efekte do kraja sajma, kazao je Salihović.

IMEL ORGANIZOVAO KONFERENCIJU U KOMORI TUZLA



IMEL doo je u Kantonalnoj privrednoj komori Tuzla, organizovao konferenciju na temu „Kako unaprijediti poslovanje uz primjenu savremenih tehnologija“. Programom konferencije predstavljena su savremena tehnološka rješenja u poslovnom svijetu koja imaju za cilj da olakšaju praćenje poslovanja, učine ga sigurnijim

i štede vrijeme. Konferencija je bila namijenjena svima, javnom i realnom sektoru (proizvodnom, trgovačkom i uslužnom) koji žele da unaprijede svoje poslovanje. Predstavljena su sledeća softverska rješenja sa osvrtom kroz praksu: “Elektronsko upravljanje dokumentima” predstavila je Sadina Šabanović mr.sci, “Elektronsko poslovanje u javnoj upravi i Jednostavnu On-line trgovinu” predstavila je Amra Brkić dipl.oec, “Proces upravljanje proizvodnjom po narudžbi” prezentirao je Senad Kapetanović dipl. oec. Također, Imel je predstavio grant sredstva namijenjena za finansiranje prezentiranih softverskih rješenja. Ovo je bila odlična prilika da se učesnici međusobno upoznaju i razmijene iskustva sa postojećim Imel korisnicima i konsultantima iz Imel-a.

MENPROM ĆE OTKUPITI SVE KOLIČINE GOVEĐEG MESA PROIZVEDENE NA PODRUČJU TK



Mesna industrija Menprom već 17 godina se bavi proizvodnjom preradevina na bazi goveđeg mesa i peradi, zapošljava 135 radnika, radi u kapacitetima 300 tona na mjesečnom nivou. U fazi je izgradnja novog proizvodnog pogona od 4.000 metara kvadratnih, koji se radi sa najsavremenijom tehnologijom i radi se po zadnjim standardima iz oblasti sigurnosti hrane. U ovom pogonu će se raditi makro i mikro konfekcija goveđeg mesa, te pakovanje svježih oblikovanih proizvoda, a za potrebe izvoza svježeg goveđeg mesa u Republiku Tursku. Direktor i vlasnik mesne industrije Menprom Mensur Alić ocijenio je da je izvoz mesa za Tursku jedan historijski projekat. Naglasio je da je Menprom krenuo u kampanju koja će se vršiti na području svih 12 općina Tuzlanskog kantona. Pozvao je sve zainteresovane da se uključe u proizvodnju goveđeg mesa, koje će Menprom otkupljivati, te da planira izvoziti svježe meso i gotove proizvode u Tursku naredne godine, u vrijednosti oko 30 miliona KM. “Želimo potpisati ugovor sa svima koji žele ozbiljno ući u posao kada je u pitanju proizvodnja mesa, uzgoj junadi” kazao je Alić novinarima u Tuzli. “Otkupit ćemo svo meso koje se proizvede na Tuzlanskom kantonu”, poručio je on. Kazao je da je Menprom rizikovao investirajući 6 miliona KM u novi objekat, ali smatra da će projekat u potpunosti uspjeti i prema njegovim riječima bit će prvi koji će se pojaviti sa pakovanim svježim mesom od pola kilograma, kilogram itd. “U narednom periodu Menprom će za potrebe projekta izvoza mesa u Tursku zaposliti 30 radnika, te uvezati nezaposlenih 2.000 kooperanata, ljudi koji će se baviti uzgojem junadi, proizvodnjom stočne hrane, ambalaže i sl.”, rekao je Alić Istakao je da ima podršku i kantonalne Vlade. Proizvodni pogon Menproma je posjetio i premijer TK, Bego Gutić, koji je ovom prilikom istakao da kompanija Menprom ide u korak sa vrhunskim svjetskim kompanijama, te da se provode najviši standardi u kvalitetu i sigurnosti hrane.



USKORO PROIZVODNJA PRAŠKASTIH DETERDŽENATA U DITI



U fabrici deterdženata Dita u Tuzli zvanično su počeli radovi na izgradnji parovoda, potvrdio je Feni Dževad Mehmedović, predsjednik sindikata radnika ove firme. Ova prepoznatljiva tuzlanska fabrika deterdženata u petak je potpisala sporazum s Termoelektranom za sanaciju parovoda. Sanacijom parovoda bit će omogućena proizvodnja praškastih deterdženata "arixa" i "ide", po kojim je ova tuzlanska firma nekada bila prepoznatljiva u regionu. – Zvanično su počeli radovi, a izvođač radova na parovodu je firma Remont montaža, trenutno se pripremaju čelične ploče, klizači i nosači za Ditin parovod – kazao je Mehmedović. Navodi da će sredstva za parovod kreditirati Elektroprivreda, a da će Dita vraćati ih na rate. Naglašava da će praškaste deterdžente "arix" i "idu" proizvoditi i za inostrano tržište. – Od početka sam govorio da ova fabrika može raditi. Nama ne treba patriotizam na jedan mjesec, ljudi treba da se u potpunosti opredijele za domaću proizvodnju – poručuje Mehmedović. Dodaje da ukoliko svi ne shvate važnost kupovine domaćih proizvoda, kad – tad će građanima to doći na naplatu, jer BiH je prezadužena i samo domaća privreda je može "popraviti". Pozvao je sve građane BiH da kupuju kako Ditiine proizvode, tako i ostale bh. proizvode.

DOBAR PROIZVOD I DOBAR MENADŽMENT, ODLIČNA FORMULA ZA USPJEH



Pivara Tuzla uspješno nastavlja sa izvozom svojih proizvoda na područje Turske i Iraka gdje su proizvode iz programa sokova prepoznali kao izuzetno kvalitetne i čija je potražnja u porastu. Prvi dio izvoza bio je usmjeren na distribuciju proizvoda pakovanih u limenke, a sada je ona proširena i na PET pakovanja. Ova

uspješna prodaja je rezultat izuzetnog zalaganja menadžmenta Pivare zajedno sa redstavniciima K.H. for General Trading LTD koji rade na širenju područja prodaje i na teritoriju Iraka. Pivara Tuzla pored ovog izvoza ima u planu i još neke poslovne aranžmane plasmana proizvoda u druge države i na tome se radi intezivno.

EKO ŽIVOT ISPORUČIO NOVE KONTEJNERE U KISELJAK



U javnom preduzeću Vodovod i kanalizacija Kiseljak izvršena je službena primopredaja novih kontejnera odnosno tzv. Zelenih otoka. Naime, nakon nedavno održanog sastanka s predstavnicima Općine Kiseljak, ovlašteni bh. operator sistema Eko život d.o.o. Tuzla se obvezao da će osigurati 10 zelenih otoka, ukupno 30 kontejnera po 1100 l. Riječ je o posudama vrhunskog kvaliteta za selektivno odvajanje otpada koje su nakon nepunih mjesec dana od spomenutog sastanka i stigle u Kiseljak, piše akta.ba. Na predstavnicima Općine Kiseljak je da izaberu lokacije, pripreme iste te osiguraju održavanje zelenih otoka. JP Vodovod i kanalizacija će biti zaduženi za redovno pražnjenje predmetnih kontejnera. Džana Halilović, predstavnik Eko života iz Tuzle koja je u prostorijama Komunalnog pisustvovala današnjoj primopredaji istakla je kako su se na donaciju odlučili jer sistem selektivnog odvajanja otpada u Kiseljaku zasad odlično funkcioniра ali i da je zapravo pokretač ove ideje bio Sarajevski Kiseljak. "Ovo je tek početak naše saradnje jer smo dosadašnjom sasvim zadovoljni. Moram naglasiti da bez društveno odgovornih kompanija, poput Sarajevskog kiseljaka koji je svoje obaveze upravljanja ambalažnim otpadom prenio na Eko život kao operatora sistema, zaista ne bi bili u mogućnosti realizirati ovakve projekte. Ono na čemu još moramo poraditi kada govorimo o ovoj temi, je svijest građana općenito", dodala je. Iz kompanije Eko život pozivaju privredne subjekte da se uključe u sistem upravljanja ambalažnim otpadom, ispune svoje zakonske obaveze i zajedno sa Eko životom, Općinom iz koje dolaze, budu pokretači značajnih ekoloških priča. Primopredaji su prisustvovali i tajnik općine Dragomir Lučić i direktor JP Vodovod i kanalizacija d.o.o. Kiseljak Mladen Medić.

D.K.




Industrijska proizvodnja na području TK


U prvom polugodištu 2015. godine, ostvaren je pad obima industrijske proizvodnje u odnosu na isti period 2014. godine u vrijednosti od 2,4%. Privreda Tuzlanskog kantona u junu 2015. godine u odnosu na prosjek 2014. ostvarila je pad industrijske proizvodnje od 2,3%. U odnosu na prvo polugodište 2014. godine, prerađivačka industrija ostvaruje rast od 1,7%, dok proizvodnja i snabdijevanje električnom energijom ostvaruje pad od 7,1%, a vađenje ruda i kamena pad od 5,0%.



U prvom polugodištu 2015. godine iz Tuzlanskog kantona ukupno je izvezeno proizvoda u vrijednosti od 599.800.000 KM što je u odnosu na I polugodište 2014. godine rast od 12,11%. U isto vrijeme je došlo do rasta uvoza od 12,37% te je uvezeno roba u vrijednosti od 694.699.000 KM. Pokrivenost uvoza izvozom je 86,34%, a u istom periodu prošle godine je bila 96,53%. Vanjskotrgovinski deficit je 94.898.000 KM. U odnosu na isti period 2014. godine, došlo je do rasta izvoza hrane i pića od 42,1%, industrijskih materijala za 17,3%, goriva i maziva 44,2%, kapitalnih proizvoda 0,3%, transportnih sredstava 1,5% i proizvoda za široku potrošnju 5,1%. Rast uvoza u odnosu na prvo polugodište 2014. godine kod uvoza hrane i pića je 2,4%, industrijskih materijala 10,1%, goriva i maziva 31,7%, kapitalnih proizvoda 26,5%, transportnih sredstava 15,5% i proizvoda za široku potrošnju 13,2%.




Najznačajniji vanjskotrgovinski partneri Tuzlanskog kantona su Njemačka, Slovenija, Italija, Hrvatska i Austrija. Prema podacima Federalnog zavoda za zapošljavanje, u junu 2015. godine u Tuzlanskom kantonu je bilo zaposleno ukupno 83.967 osoba. U odnosu na prethodni mjesec, broj zaposlenih je veći za 0,5%, dok je u odnosu na prosjek 2014. godine broj zaposlenih veći za 2,9%. Prerađivačka industrija i trgovina zapošljavaju najviše osoba.



	Zaposlenost (VI 2015)	Nezaposlenost (VI 2015)	Prosječna plaća (VI 2015)
UKUPNO	83.967	96.555	735
Banovići	5.286	5.455	844
Čelić	912	2.710	643
Doboj-Istok	1.610	2.568	525
Gračanica	9.094	9.361	532
Gradačac	7.350	7.321	580
Kalesija	3.521	8.757	618
Kladanj	2.023	2.718	629
Lukavac	8.400	10.695	744
Sapna	620	2.543	782
Srebrenik	4.928	8.591	618
Teočak	447	1.798	752
Tuzla	31.276	20.145	866
Živnice	8.500	13.893	694

Prema podacima Federalnog zavoda za zapošljavanje, u junu 2015. godine je registrovano 96.555 nezaposlenih osoba ili 0,22% više u odnosu na maj 2015. Prema stručnoj spremi, najviše je KV i NKV radnika, a slijede osobe sa srednjom stručnom spremom.

VSS	Broj	VŠS	Broj	SSS	Broj	KV/ VKV	Broj
Ekonomist	1066	Nast.raz. nast.	185	Gimnazija	4058	Prodavač	5953
Pravnik	834	Ekonomist	72	Maš. teh.	3180	Automeh.	2228
Pedagog	340	Pravnik	58	Ekon. tehn.	2238	Bravar	2142
Prof. bosan-skog	268	Ekon.sluz.	33	Ekon. sluz.	1537	Kuhar	1505
Prof.fiz.i zdr.kult.	169	Nast.tehn. kult.	19	Hem. tehn.	1226	Vozač ter. voz.	1482



Prosječna neto plata u Tuzlanskom kantonu u junu je iznosila 735,00 KM što je ispod prosjeka Federacije BiH. U odnosu na kantonalni prosjek iz 2014. godine, neto plaća je manja za 0,5%. Najviše prosječne neto plate u Tuzlanskom kantonu su u sektoru proizvodnje i opskrbe el.energijom, dok su najniže prosječne neto plate u građevinarstvu.

STRUČNA SLUŽBA KOMORE



KANTONALNA PRIVREDNA KOMORA TUZLA
THE CHAMBER OF ECONOMY OF TUZLA KANTON
KANTONALE WIRTSCHAFTSKAMMER TUZLA

WWW.KPKTZ.BA

BUDITE I VI ČLAN



O KOMORI → PRIVREDNA TK → REGISTAR → VIŠE →

Q



PRVA POSJETA MANDATARA GUTIČA KOMORI

Konsultacije sa privrednicima

BUDUĆI PREMIJER SA
PRIVREDNICIMA



Zvanična posjeta Kantonalnici

PRVI PRICON WATER &
ENERGY™



Prezentacija u Komori, 23.



TREĆI JAVNI POZIV




Javni poziv za kandidovanje

Programa uloška preostalih

aktivnosti, uključujući one sa udjelom u

WWW.KPKTZ.BA



TUZLANSKI